

Q. D. B. V.

VINDICIÆ JURIS
MAJESTATICI CIRCA
SACRA,

Adversus Autorem simplicis Consilii, quo-
modo Ecclesiæ Protestantium sint uniendæ,

Quas

RECTORE MAGNIFICENTISSIMO

SERENISSIMO PRINCIPE ac DOMINO,
DN. FRIDERICO WILHELMO,

Electoꝛatus Brandenburgici Herede, &c. &c. &c.

SUB PRESIDIO

DN. CHRISTIANI THOMASII, Jcti,

Consiliar. Electoꝛ, Brandenb. & Prof. Publ,

ac Facult. Jurid. p. t. DECANI

Publica Eruditorum disquisitioni submitteret

HIERONYMUS RIESE,

Cassellanus Hassus,

ad Diem. 30. Junii M DC XCIX.

H. L. Q. C.

LITERIS HALÆ MAGDEBVRGICÆ,
CHRISTOPHORI SALFELDII,
TYPOGR. ELECT, BRAND.



121

THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE

OF THE


OF THE

OF THE

OF THE

OF THE

OF THE



VINDICIÆ JURIS MAJESTA- TICI CIRCÀ SACRÀ

Adversus Autorem simplicis consilii, quomodo
Ecclesiæ Protestantium sint uniendæ.

SUMMARIA.

Inroitus. §. 1. *Occasus dissertationis.* Birsteinische Antwort auff die
Nethenische Verantwortung. §. 2. Einfältige Anweisung
wie die protestirende Kirche unter sich zu vereinigen etc. §. 3.
Summa libelli. *Sententia Autoris de instituendo Presbyterio in*
singulis Ecclesiis, §. 4. *De potestate Magistratus Politici in rebus*
Ecclesiasticis, §. 5. *de officio Ministrorum Ecclesiæ*, §. 6. *quomodo*
Ecclesiæ Protestantium sint emendandæ, §. 7. *de Decimis Presby-*
terio solvendis, §. 8. *de modo sustentandi Presbyterii*, §. 9. *de*
Excommunicatione §. 10. *Et Pœnitentia*, §. 11. *de pietate*
seu cultu divino, §. 12. *de conventibus Ecclesiasticis Et Conciliis.*
§. 13. *de componendis controversiis inter Protestantæ.* §. 14. *Ju-*
dicium generale de hoc scripto. §. 15. *Status controversiæ Et sum-*
ma dicendorum §. 16. *Primarium prejudicium auctoris, ac si Ec-*
clesiæ potestas aliqua Politicæ competat. §. 17. *contrà dictum*
Christi Luc. XXII. 25. §. 18. *Quid sint gubernatores Rom. XII.*
Et 1. Cor. XII. §. 19. 20. 21. *Christum non præcepisse excommu-*
nicationem §. 22. *nec Paulum.* §. 23. *Noluisse unquam Spiritum*
S. *controversias fidei per majora vota dirimi.* *Differentia con-*
cilii Apostolici à conciliis reliquis. §. 24. *Apostolos non consuevisse*
Episcopum reliquos Presbyteros eminentem, §. 25. *Principes Pro-*
testantes non peccasse, quod Jus Episcopale sibi vindicaverint.
§. 29. *Falsum videri ac si Doctores protestantes in eo consentiant.*

A. 2

quod

quod vitio non sit vertendum Magistratui Politico si in negotiis religionis sibi plus iusto quid tribuat. §. 27. Autoris axiomata & hypothefes cum nostris limitationibus §. 28. 29. 30. Monica quaedam de iure conscientia erronea. §. 31. Nulla exempla neque divina neque humana perspicuè regulam vel legem facere. §. 32. Autore sapius impingere dum ex exemplis regulam facit. §. 33. Quod majestas debeat curam habere salutis aeternae subditorum ex Deut. XVII. 18. non probari §. 34. Exempla Davidis & aliorum Regum sententia auctoris parum prodesse §. 35. An magistratus ex beneplacito quid possit in sacris ordinare? §. 36. Autorem falso gloriari de demonstratione sententiae suae §. 37. sed potius ipsummet arma adversus se suppeditare. §. 38. ac rationes parum aptas asferre §. 39. & principiis Papismi favere §. 40. Argumentum auctoris primum adversus Jus Magistratus Politici. §. 41. Id inverti posse adversus auctoris sententiam. §. 42. Autorem miscere legem & facultatem ac alia. §. 43. Summa demonstrationis, qua ex Jure Naturae Magistratui Politico jus circa sacra vindicatur. §. 44. Alia fallacia in argumento Auctoris §. 45. Fallere autorem, dum praxin Conciliorum sub Constantino &c. ad leges positivas Spiritus Sancti retulit, §. 46. ac leges Ecclesiasticas in Concilio Hierosolymitano conditas asserit §. 47. atque pro jure Ecclesiae in definiendis controversiis dicta quaedam miserè torquet §. 48. ac in ostendendo jure excommunicandi paria facit §. 49. Injustum esse postulat auctoris, volentis, Magistratum Politicum debere specialem legem divinam pro jure suo allegare. §. 50. Fallacia auctoris in disputatione adversus eos, qui Principum imperium circa sacra ex instrumento pacis vel superioritate territoriali deducunt. §. 51. Jura qua Auctor Magistratui Politico tribuit, stabiliunt Papo-Cesariam, & Magistratum subjiungunt Clero. §. 52. Autorem ipsum, dum singulis Theologiis infallibilitatem denegat, gravem objectionem contra auctoritatem Conciliorum suppeditare §. 53. Papo-Cesariam etiam stabiliri ab Auctore in §. 19. cap. 3. §. 54. Fallaciam non causa ut causa committi, dum Auctor primum litigandi in Clero culpa Magistratus Poli-

Politici adscribit. §. 55. Falso gloriari Autorem, quasi ejus doctrina sit propugnaculum inexpugnabile Regiminis Ecclesiastici §. 56. Autorem in deducendo jure Ecclesia circa ordinationem Ministrorum malè ex exemplis facere regulam §. 57. sententia nostra de jure Patronatus §. 58. Excommunicationem Theodosii ab Ambrosio non fuisse licite factam. Forte & nunquam factam fuisse §. 59. Conclusio de utilitate doctrinae nostrae. 60.

§. 1.



Non fuit Reformatorum Ecclesiæ superiori Seculo tam in Helvetiâ, quam in Saxoniâ intentio, ut plebem à subjectione & obsequio Magistratus Politici liberarent, sed ut Magistratum pariter Politicum ac totum populum à tyrannide Papali, primæque & Christianæ libertati restituerent. Nec continet utraque Protestantium Confessio quicquam, quod Ministros verbi ab obedientia Magistratus Politici eximat, multo minus hunc auctoritati Ministrorum subiciat, quin potius publica & tantum non unanimis doctrina utrobique in eo conspirat, ministros Ecclesiæ æque subiectos esse Principi ac reliquos cives, & Principi competere potestatem leges præscribendi ac ordinationes æque in rebus Ecclesiasticis, atque in secularibus. Observatum tamen fuit jam aliquoties à piis ac prudentibus quibusdam viris, quod in utraque Protestantium secta doctrinæ quædam subinde à nonnullis propositæ fuerint, quæ vel Magistratui plus quam liceret tribuerent, vel Ministris Ecclesiæ majorem potestatem, quam quæ ei verbo Dei iis competat, adscriberent, atque sic in alterutrum duorum extremorum hic maxime vitandorum, Cæsaro-Papias aut Papocæsarias, dilaberentur. Igitur ut istos duos capitales in Jurisprudentia Ecclesiastica errores genuinus Jurium studiosus evitet, maximo opere studendum est.

§. 2. Incidi non ita pridem in Scriptum Germanicum, Ofsenbachii ad Mænum hoc anno publicatum, cujus titulus est: Vir-

Reinische Antwort auff die Nethenische Ubelgegründete Berantwortung / in quo p. 169. seqq. refertur, quod Inspector Iſenburgenſis Nethenius, cum ab Illuſtriſſimo Comite Iſenburgenſi & Birſteinenſi de abuſibus quibusdam corrigendis ac vitandis ſub pœna remotionis admonitus fuiſſet, obedientiam ſub iſtis prætextibus denegaverit: (1.) quod Juſtus fide ſua vivere debeat, (2.) quod Fides ſe fundet in ſancto Dei verbo, (3.) quod Fides fideles vere fidos (getreu) faciat, ac propterea ejusmodi Paſtores ab omnibus, præprimis vero ab omni Magiſtratu amandi ac protegendi ſint. Cum autem ipſe ex Sacro Dei verbo didicerit, quod JESUS CHRISTUS, tanquam Archi Episcopopus animarum, ſolus ſit unctus Rex Sionis, ac ſolus Legislator omnium Statuum, atq; quod, uti Paſtores non officio Magiſtratus, ita nec Magiſtratus officio Paſtorum ſe immiſcere debeant, (exemplo Conſtanti- ni M. qui ſe ſaltem Episcopum extra Eccleſiam dixerit, Clerum vero in rebus in Eccleſia;) non poſſe ſalvo honore Regis Sionis Chriſti & ſalva conſcientia ſua alium Legislatorem, quam Jeſum Chriſtum agnoſcere in ejusmodi rebus: v. g. quod uxor ejus cum non debeat comitari, quando auditores ſuos viſitet; quod officium ſuum ſecundum formulas præſcriptas debeat peragere; quod nunquam fabulas pro concione proponere debeat; quod durioribus expreſſionibus uti non debeat in corrigendis vitiis, &c. ſubjungit denique, quod, etiamſi in aliquibus bona fide erraverit, tamen non poſſit adverſus conſcientiam ſuam ad contraria facien- da adigi, cum DEUS ſolus imperet conſcientiis &c.

§. 3. Miratus ſum valde hominis aut ignorantiam aut impu- dentiam, aut utrumque, tam lubricis ac ineptis argumentis in de- fendenda cauſa injuſta, utentis, ac putavi non indignum eſſe id argumentum, in quo tractando ſpecimen profeſſuum publicum ederem. Cum tamen mox ibidem p. 180. ſeqq. legerem Reſpon- ſum Facultatis Theologicæ Marpurgenſis, graviter n̄vos hos Inspectoris notantis, ac pœnam Remotionis ei dictantis, depre- hendi id negotium ita ſufficienter ibidem eſſe expoſitum, ut mihi nihil reſtaret, quod erudito illo reſponſo addere poſſem. Adeo- que

que jam in eo eram. ut de alio themate circumspicerem, cum alius quidam libellus Germanicus Anonymi offerretur, (eodem hoc anno publicatus, quamvis in rubrica præcedentem annum præferat) qui ut prius propositum reassumerem persvadebat. Titulum habet: *Einflüßige Anweisung wie die protestirende Kirche unter sich zu vereinen / und in allen Dingen deroßsen zu verbessern sey / daß sie mit Wahrheit der ersten Apostolischen Kirchen gleich geachtet werden könne.* Constat libellus hic capitibus viginti, quorum summam ad meliorem dicendorum intellectum paucis exhibuisse non pigebit.

§. 4. Primo docet, Ecclesiam Christi Jerosolymitanam à novendecim Ministris, duodecim videlicet Apostolis & novem Diaconis fuisse gubernatam, *Act. cap. 6. v. 1. seqq. (Cap. I. §. 5.)* Postea ex Papatu ortum esse, ut Ecclesiæ plurimæ tantum uno ministro gaudeant, adeoque opus esse, ut Ecclesiæ Protestantium in hoc puncto ulterius reformentur, atque singulæ Ecclesiæ tot ministros accipiant, quot iis opus sit, ut in Christianismo rectè fundentur ac gubernentur, *(Cap. I. §. 7.)* Neque posse hunc defectum excusari per distinctionem inter Ecclesiam plantandam ac plantatam, utpote quæ sæpius adhibeatur ad palliandas plures abominationes atque scandala. *(Cap. I. §. 9.)* Quin potius evidens existere, potissimam causam, quod malitia auditorum à Presbyteris non possit cum effectu coerceri, esse, quod tam exiguus eorum sit numerus. *(Cap. I. §. 10.)* Christum vero ipsum verbis satis perspicuis præcepisse, ut peccatores se non emendant, toti Ecclesiæ manifestentur, & per hujus cognitionem, in qua non unus sed omnium ac singulorum presbyterorum potissimæ partes esse debeant, ex Ecclesia ejiciantur. *[Cap. I. §. 11.]* Presbyteros autem ita constituendos sibi æquales esse debere ac unanimes. Neque hoc difficile fore: *Quandiam* enim Spiritus Christi in iis regnet, ipsos etiam charitate, unanimitate, pace, humilitate & aliis virtutibus fore præditos, atque eos non solum in doctrina sed & in vita fore unanimes. *(Cap. II. §. 4. & 5.)* Præcedere vero debere eos solum, qui vocatione seniores sint, *(Cap. II. §. 5.)* atque

que adeo & hic ut & in aliis punctis corruptum nostrarum Ecclesiarum statum secundum Ecclesiam Apostolicam esse reformandum: Apostolos autem in quacunq; particulari Ecclesia aliquem constituisse supremum *gubernatorem*, eique titulum Episcopi, aliàs omnibus Presbyteris competentem, tribuisse. [*Cap. II. §. 6.*] Porro sub Imperatoribus Christianis Episcopos sibi vindicasse regimen seculare & inde in Jure Canonico sibi Jus aliquod Episcopale formasse. [*Cap. II. §. 7. & 8.*] Debuisse itaque tempore reformationis presbyteria institui cum Diaconis, sic ut ea per electum ab Ecclesia Episcopum secundum Leges Ecclesiasticas gubernata fuerint, sed hujus institutionis loco Principes Jus Episcopale sibi vindicasse, cum tamen Jus Episcopale sit tyrannis animorum. (*Cap. II. §. 9.*)

§. 5. Debere equidem Magistratum Politicum curam gerere religionis & salutis æternæ subditorum suorum, ac posse adeo Magistratum Politicum assumere Consiliarios Ecclesiasticos ab eo solo dependentes, cum quibus sæpius de rebus Ecclesiasticis & defectibus religionis in territorio suo conferat, ac quomodo emendandi sint, deliberet; per quos etiam visitationes Ecclesiasticas instituatur, atque inquirat, quomodo subditi in religione & cultu divino versentur, ut, sicubi defectus aliquis deprehendatur, auxilio Magistratus indigens, is eo citius manifestetur ac tollatur. Id vero non posse nec debere agere Magistratum Politicum, ut per istos Consiliarios Ecclesiasticos Ecclesiæ legibus à solo Magistratu Politico conditis regantur, Ecclesiis Ministri præponantur ac confirmentur, controversiæ Ecclesiasticæ dirimantur, disciplina Ecclesiastica instituatur, minuatur, augeatur, dispenfentur & abrogetur, formulæ precandi præscribantur, Ministri Ecclesiæ in rebus spiritualibus se ad bene placitum Magistratus Politici non accommodantes dimittantur, atque alii in eorum locum collocentur, sed hæc omnia relinquenda esse judicio Ecclesiæ ac Presbyterorum. (*Cap. III. §. 10. 13. 15. 16.*) Inprimis autem non Principi sed Ecclesiæ committendam esse electionem Presbyterii & Episcopi. (*Cap. IV.*) Jus Patro natus ex Papatu habere ortum ac Ecclesiæ Apostolicæ repugnare, atque iterum abrogandum esse

esse. Et adeo teneri Patronos Protestantium Ecclesiarum, ut id cedant iterum Ecclesiis. (*Cap. V.*)

§. 6. De officio Ministrorum Ecclesie sic pronunciat. Actiones Concionatorum nostrorum, ac præcipuè Conciones non sufficere, ut Auditores evadant pii, sed insuper requiri, ut diligentius instituatur examina Catechetica. Sed & nec hæc esse sufficientia, cum defectus insignis sit Ecclesiarum nostrarum, quod careant disciplina Ecclesiastica. (*Cap. VI. §. 1. & 2.*) Hanc verò consistere in diligenti visitatione domestica, & inspectione morum in conviviis, diversoriis &c. (*Cap. VI. §. 3.*) isto quidem processu, ut si Presbyteri quosdam deprehendant inordinatè viventes, nec admonitioni privatæ parentes, eos adhuc semel vel per duos aut tres Presbyteros, vel etiam per totum Presbyterium verbis coërceant, & si nec tunc se emendent, rem ad totam Ecclesiam deferant, eosque publicè coërceant. Si nec Ecclesiam audiant, ut eos excommunicent, secundum doctrinam Christi. (*Cap. VI. §. IV.*) Quod si quis dicat, ita durissimæ servituti subjici Christianos, ei respondendum esse: (1) Sacram Scripturam eum modum jubere: (2) Etiam Romanos (populum tamen liberum) Censores morum tanquam certum Magistratûs genus cum fructu habuisse: (*Cap. VI. §.*) Debere insuper etiam Presbyteros habere curam bonorum Ecclesiasticorum ad sustentandos pauperes, egenos, & exules. (*Cap. VI. §. 6.*)

§. 7. Tum consilium suppeditat, quomodo Ecclesie Protestantium sint emendandæ. In singulis nimirum Ecclesiis ex 600. vel 800. circiter personis constantibus debere duos Presbyteros constitui, ut ministros verbi & doctrinæ, duos alios, ut Censores morum, quotidie suos auditores visitantes & mores eorum secundum leges Spiritus S. examinantes, duos Diaconos bona Ecclesiastica administrantes & curam gerentes pauperum, duos Informatores Juventutis vel præceptores scholasticos, ac denique duas Diaconissas, quæ puellas instruant, ac curam gerant ægrotorum, atque horum omnium numerum augendum esse pro multitudine personarum Ecclesias constituentium. (*Cap. 7.*)

§. 2. 3.) Ab hoc Presbyterio Conventus esse instituendos de viris irruentibus, de iis, quibus indigeat Ecclesia, de instructione, & emendatione Ecclesie, de coërcitione & excommunicatione impœnitentium, de Edificiis Ecclesiasticis &c. (*Cap. VII. §. 4.*) Ope hujus Presbyterii occurri posse dubio, quod quis facere possit de inconvenientia, si hominibus ignorantibus ac rusticis relinqueretur electio Presbyterorum. (*Cap. VII. §. 5.*) Reliquis dubiis occurri posse electione Episcopi & Archiepiscopi, qui tamen subiecti esse deberent Synodo, (*Cap. VII. §. 6. & 7.*) atque conclusum Synodi Provincialis esse assumendum tanquam veritatem cœlestem. (*Cap. VII. §. 7.*)

§. 8. De sustentatione verò tot Presbyterorum illud consilium suppeditat, ut Decimæ iterum introducantur. (*Cap. VIII.*) Decimas verò non esse juris naturalis, sed positivi, neque tamen in Novo Testamento præceptas, neque in Ecclesiâ Apostolicâ usurpatas. (*Cap. IX. §. 1. 2. 3.*) Romanos etiam Pontifices, ut se in statu quieto, divite atque exoptato constituerent, omnia ex Veteri Testamento acquisivisse, & pederentim Christianæ religioni assuisse; atque adeo & de præstandis decimis legem fecisse, (*Cap. IX. §. IV.*) quæ jam tempore Constantini M. item Caroli M. & Ottonis M. observata sit. (*Cap. IX. §. 5.*) Quamvis itaque lex illa populum Christianum per se non obliget, utile tamen esse, si Populus Christianus ipse talem legem conderet, vel si Princeps Christianus talem legem daret subditis suis ac populis devictis, quæ haud dubiè etiam illos sit obligatura. (*Cap. IX. §. 6.*) Causas vero, cur lex hæc Pontificia de decimis non ubivis sit observata, esse, quod vel ab initio non omnes Laici decimas illas solverint, vel quod occasione protectionis ac defensionis militaris Ecclesie adversus Ethnicos aut hæreticos decimas de facto magis, quàm ex concessione Ecclesie usurpaverint. (*Cap. X. §. 1. 2.*) Neque tamen etiam concedi eam ob causam Laicis decimas potuisse, partim, quia isti Hæretici aut oppressores Ecclesie non solum Cleri, sed vel maximè Laicorum jura invadere voluerint, (itaque Laicos Ecclesiam defendendo gessisse negotium

tium proprium,) partim quod Laici tanquam nutrices Ecclesiæ debuerint eam exemplo Constantini, Theodosii, Caroli, Ottonis, Magnorum, gratis defendere; partim quod bona Ecclesiæ alienari nequeant, & esse sacrilegii speciem, si Laici auferant Ecclesiæ decimas, neque possint ab iis tanquam rem furtivam salvâ conscientia retineri. (*Cap. X. §. 6. & 8.*) Sed & aliis modis ad Laicos venisse perceptionem decimarum; alibi enim hos absque ullo iustitiæ prætextu merâ violentiâ invasisse decimas; alibi Episcopos cognatis suis Laicis decimas injustissimè vendidisse, aut donasse; alibi occasione delinquentis Clerici decimas à Laicis fuisse abreptas. (*Cap. X. §. 5. 6. 7.*) Etsi vero in pace religioſa quedam de retentione decimarum sint disposita, illam tamen dispositionem non excusare Protestantés inter se, quin potius tempore reformationis & hunc abusum fuisse reformandum, atque decimas iterum Ecclesiis tribuendas, quia vero tum non fu erit factum, adhuc fieri debere. (*Cap. X. §. 9. 10.*) Magna insuper damna exorta esse ex ablatione decimarum, cum Dos Ecclesiæ, Legata ad pios usus, collectæ Eleemosynæ &c. non fuerint sufficientes ad sustentationem Ministrorum, sed cum maximo scandalo accidentia fuerint introducta, ac ita functiones omnes spirituales Laicis vendi cœperint. (*Cap. XI. §. 1. 2.*) In specie nummum confessionarium præbere maxima scandala atque adeo tollendum esse. (*Cap. XI. §. 3. usque ad 14.*) Simul vero scandala illa omnia non difficulter tolli posse, si decimarum perceptio iterum concederetur Ecclesiæ, adeoque utile esse, ut Princeps ipse Evangelicus subditis suis hâc parte bono exemplo præiret, ac ita eos, ut spontè eum imitarentur alliceret. Cunctantes tamen & inobedientes aliis mediis ad solutionem decimarum adigi posse. (*Cap. XI. §. 15.*)

§. 9. Itaque, quod modum sustentandi Presbyteros attinet, putat autor: Decimas reintroducendas, item dotem Ecclesiæ, stipendia ac Legata ad pias causas à Diaconis administranda esse, cessantibus omnibus Accidentiis, quorum loco eleemosynæ colligendæ sint. (*Cap. XII. §. 1.*) Quod si hic thesaurus Ecclesiæ ad

sustentandum Presbyterium nondum foret sufficiens, bona Canonicorum ei esse addenda, tanquam inutilem terræ ponderum. (*Cap. XII. §. 2. 3.*) Porro ex hoc thesauro salaria inter ministros Ecclesiæ æqualiter esse distribuenda, quo pacto putat cessatura pleraque vitia Cleri, rixas, invidiam, superbiam, avaritiam, cupiditatem ditiorum præbendarum, ac officiorum ambitum &c. (*Cap. XII. §. 4.*) Istam verò salariorum æqualitatem sic esse intelligendam, ut singulis presbyteris verbi ac doctrinæ item Diaconis & præceptoribus necessaria ad sustentationem trium vel quatuor personarum suppeditentur, ac liberis eorum impensæ ad studia aut opificia exhibeantur, & filiæ dotentur; censoribus vero morum id tantum porrigatur, ut ipsi solum se exhibere valerent. (*Cap. XII. §. 5.*) Ulterius ex isto ærario Ecclesiæ esse nutriendas viduas & orphanos, bibliothecam communem esse comparandam, non permittendam esse mendicitatem, sed pauperes sustentandos, pauperiores etiam concives in solutione vestigalium & tributorum esse adjuvandos, extruenda esse prochotrophia, ergasteria &c. Et tamen in Ecclesiis civitatum majorum tantam sperandam esse abundantiam, ut ex superfluo adhuc æraria pauperiorum Ecclesiarum suppleri possint. (*Cap. XII. §. 6.*) Simul verò cavendum esse, ne Clerici immobilia possideant, aut alio civium Laicorum vitæ genere utantur. (*Cap. XII. §. 7.*)

§. 10. De excommunicatione sic sentit: Christum & Apostolos non solum intendisse, ut homines à cultu Ethnico & Judaico averterentur, sed & ut à vitâ impia ad piâ manuducerentur. (*Cap. XIII. §. 2.*) Itaque Christianum gravius crimen committentem, ex cœtu Ecclesiæ esse excludendum, idque ob legem à Paulo Corinthiis & aliis fidelibus datam 1. *Corinth. 5. v. 5. & 11. 2. Thess. III. v. 6. & 14.* (*Cap. XIII. §. 3. 4. 5.*) neque Paulum (jubentem ut excommunicatus habeatur, non ut inimicus sed & frater,) contradicere Christo *Matth. XII.* volenti, ut habeatur tanquam Ethnicus. Paulum enim loqui de prioribus tribus gradibus à Christo, ut ante excommunicationem observentur, præscriptis.

(*Cap.*

(*Cap. XIII. §. 6.*) Adeoque eos, qui coram Ecclesiâ coërceantur statim quidem in cœtu non esse tolerandos, sed non statim diabolo tradendos. (*Cap. XIII. §. 7.*) Omnia verò opera carnis mereri excommunicationem, sine respectu personarum, (*Cap. XIII. §. 8.*) eamque à Sp. S. esse præceptam, partim quia delinquens per peccata sua seipsum extra communionem cum Deo posuerit; partim, ne alios exemplo suo seducat; partim ut Ethnici severitatem Ecclesiæ Christianæ ejusque præstantiam præ aliis sectis sentiant. (*Cap. XIII. §. 9.*) Igitur & nos adstringi, ut excommunicationem introducamus iterum, non quidem ab Episcopo solo, nec etiam à solo Presbyterio, sed à tota Ecclesiâ expediendam, secundum processum à Paulo præscriptum, *1. Corinth. V. v. 13.* ut videlicet excommunicatus, si ipse exire nolit, extrudatur, ac à custodibus retineatur, ut non rursus Ecclesiam intret. Quod si Ecclesia ex negligentia aut timore nolit excommunicare, tum potestatem extraordinariam excommunicandi competere (iterum exemplo Pauli *1. Cor. V. v. 3. seq.*) supremo Presbytero tanquam in casu necessitatis. (*Cap. XIII. §. 10. 11. 12.*) Atque hunc excommunicationis modum observasse Christianos sub temporibus Constantini, qui tamen ab omnibus sectis habeantur pro genuinis Christianis. (*Cap. XIII. §. 14. 15.*) Nec quicquam dictis ob stare, quod Judas proditor à Christo ad communionem sacram fuerit admissus. Id enim aperte falsum esse, & Judam potius exiisse, antequam cœnæ sacramentum fuerit administratum, & procul dubio Christum, si non sponte exiisset, ei mandaturum fuisse abitum. (*Cap. XIV.*)

§. 11. Excommunicatos autem non statim esse recipiendos, quamprimum dicant, se facti pœnitere, nam excommunicatum à Paulo minimum per annum in excommunicatione mansisse. (*Cap. XV. 1. 2. 3.*) Hanc dilationem esse utilem excommunicato, ut certa signa pœnitentiæ det, Ecclesiæ, ad sui erectiorem, & infidelibus ad convictionem. Interea igitur pœnitentem emendari atque in omnibus actionibus exterioribus triste quid testari. In receptione autem Ecclesiam respicere debere

partim circumstantias peccati commissi, partim pœnitentis. (Cap. XV. §. 4. 5. 6. 7.) In primâ Ecclesiâ receptionem factam esse multis solennitatibus. Fuisse enim ibi triplicem classẽ Christianorum, Catechumenos, Fideles, & Pœnitentes, atque ideo etiam fuisse triplicem pœnitentiam, Catechumenorum, Fidelium & Pœnitentium. (Cap. XV. §. 8. 9.) Pœnitentes publicè coram limine Ecclesiæ flexis genibus ac sæpe substratis corporibus fideles orasse, ut coram Episcopo pro receptione eorum intercederent, exemplo Anatolii, Ecebolii &c. (Cap. XV. §. 10.) Fuisse etiam aditricos, ut iussui Episcopi cuicunque satisfactionis loco obedirent, quodcumque & quamdiu Episcopus aliquid faciendum ipsis imponeret. (Cap. XV. §. 11.) Fuisse vero ordinariè quatuor gradus pœnitentiæ, Fletum, Auditionem, Substrationem, Systasin, quibus absolutis iterum solenniter recepti fuerint. (Cap. XV. §. 12. 13. 14. 15. 16.) Etiam si autem iste modus in sacris literis non sit fundatus, debuisse tamen protestantes eum retinere, quia iam tempore virorum Apostolicorum fuerit usu receptus, & Ecclesiæ Christianæ nunquam nocuerit, sed multò magis multas attulerit utilitates. Si Symbolum Nicenum, ut credimus, à Spiritu Sancto ortum habeat, cur non & Leges Ecclesiasticæ Concilii Nicœni Spiritu S. adscribendæ forent. (Cap. XV. §. 17.) Illustre exemplum pœnitentiæ esse Theodosii M. & excommunicationis ab Ambrosio Episcopo Mediolanensi factæ, quæ contra nonnullos defenditur. (Cap. XVI.)

§. 12. Pergit ad cultum divinum, seu pietatem & hic quoque multa monet. Videlicet per Pietatem sæpe in scripturis denotari vitam Sanctam, aliquando tamen etiam denotari cultum orationis, cantionum &c. (Cap. XVII. §. 1.) Non omnes homines ad eum aptos, sed selectum personarum observandum esse. (Cap. XVII. §. 2.) Cultum nostrum non convenire cum cultu primitivæ Ecclesiæ, adeoque in multis reformatione habere opus, præprimis ut distinctio inter Catechumenos, Fideles & Pœnitentes tanquam Novo Testamento conveniens observetur, & Fidelibus Laicis permitteretur, in convenibus Ecclesiasticis quædam

dam ex verbo Dei proponere, utpote quo modo lis inter eos qui Pietistæ vocantur, & qui Antipietistarum nomine gaudent tolli possit; Mulieres tamen in Ecclesia tacere debere, neque adeo hoc consilium Quakerismum sapere [*Cap. XVII. §. 3. uñq; ad §. 8.*]

§. 13. De conventibus Ecclesiasticis monet: in Ecclesia militante ob scandala & errores, conventus ab Ecclesia haberi debere. Atque hos triplices esse; Universales, particulares & particularissimos. (*Cap. XIII. §. 1. 2.*) Ad particularissimos pertinere quorum exempla occurrant *Act. XXI. v. 17. seq.* super factò Pauli & *1. Cor. V.* super Incestuoso. (*Cap. XIII. §. 3.*) In histractari de negotiis ad ecclesiam certi loci tantum pertinentibus. Processum in scandalo dato eam esse, ut Fideles loci extraordinariè congregentur, diffamatum ad se citent, ejus defensionem aut confessionem audiant, tum in causa definiant, omnia tamen secundum verbum Dei & praxin primitivæ Ecclesiæ sine distinctione personarum. Et ut omnia sancto ordine agantur, etiam Episcopi ejus loci præsentiam esse necessariam. [*Cap. XVII. §. 4.*] Synodos Universales non esse sperandas, ergo frustrà de earum ordine quid dici: Particulares esse vel Nationales vel Provinciales vel Diœcesanas. In diœcesanis tractari debere de scandalis, quæ per Synodos particularissimas tolli non possent. In Nationalibus aut Provincialibus Leges Ecclesiasticas esse condendas ac controversias religiosas definiendas, à singulis particularibus Ecclesiis presbyterum, vel, si hoc informe videretur, Episcopum cum instructione eò esse alegandum. Quodsi hæc fierent, magnam spem esse, ut multa salutaria & proficua institui possint: (*Cap. XVII. §. 5.*) v. g. de emendatione Ceremoniarum & Adiaphororum, item de controversiis doctrinæ & fidè inter protestantes. Quod enim hætenus per colloquia varia eadem non sint sopitæ, causam inter alias esse, quod ad talia colloquia Presbyteri non sint à singulis Ecclesiis missi, sed quod utrobique Principes elegerint doctissimos atque cum certis instructionibus alegaverint. Qui adeo magis Legati Principum quam Ecclesiæ fuerint, cum tamen Deus non per sapientes & potentes sed per imbecilles & contemptos velit Ecclesiam suam ædificari.

[*Cap.*

[*Cap. XV II. §. 6.*] Consultit igitur, ut in singulis Ecclesiis singuli sub directione Presbyterii de controversiis religionis, disciplinæ & Legibus Ecclesiasticis &c. deliberent, & per majora secundum verbum Dei conclusum faciant. Hoc conclusum in Synodo diœcesana Episcopo & duobus, è singulis Ecclesiis congregatis Presbyteris, esse proponendum, conclusum hujus Synodi ad suas Ecclesias esse rescribendum, ita tamen ut & singularum Ecclesiarum judicia de hoc concluso audiantur secundum voluntatem Spiritus Sancti, cum Spiritus Prophetarum subjecti sint Prophetis. Denique conclusa diœcesium in Synodis Provincialibus & Nationalibus esse proponenda, ubi mox conclusum generale sperandum sit, cui se sponte omnes essent subjecturi præmissis, si Princeps hic jure suo uteretur, defendendi conclusum Concilii ejusmodi liberi, & dissentientes ac contradicentes ex terris suis ejiciendi, ac doctores in conciliis damnatos deponendi. (*Cap. XVIII. §. 7.*) Apud Protestantes omnia esse inversa. Eruditos hic omnia agere, confessiones facere secundum beneplacitum, atque his querere defensionem potentum, principes mandare subditis credenda, iis leges Ecclesiasticas item ordinationes circa Adiaphora, disciplinam & regimen Ecclesiasticum pro lubitu proponere, ut ita inter Protestantes Ecclesiæ sint in miserrima servitute, ac nihil proficui hoc modo efficiatur; profanari sanctum cathedræ locum publicatione legum Ecclesiasticarum, quas nemo observet: disciplinam Ecclesiasticam quotidie magis magisque ruere, cum potentes se disciplinæ nolint subdicere: Pro Adiaphoræ litigari intemptivo zelo à Laicorum vulgo, hærente in cortice, ac genuinæ veritatis Evangelicæ ignaro &c. Hanc autem inconvenientiam omnem inde oriri, quod nulla Concilia habeantur apud Protestantes, quæ tamen genuina remedia sint, Ecclesiam Christianam & in doctrina & in vita reformandi & emendandi (*Cap. XVIII. §. 8.*)

§. 14. Denique de controversiis inter protestantes & earum compositione agit, puta de cœna Domini, de absoluto de credo, de ubi quitate corporis Christi, de communicatione idiomaticum. &c. Historiam singularum controversiarum recenset, asserens, dissentientes utrobique se debere tolerare, cum controversiæ non perineant

neant ad articulos fundamentales fidei, & ita in utraque secta quis salvari possit. Id tamen desiderat, ut Reformati in administratione cœnæ una formula cum Lutheranis utantur. (*Cap. XIX.*) Pergit deinde ad controversias circa res, à Deo non præceptas. Exorcismum arbitratur multis ex causis esse abrogandum, & quod etiam deficiente abrogatione Synodali quilibet presbyter, tanquam rem conscientix adversam exemplo Lutheri propria auctoritate eum omittere possit. [*Cap. XX. §. 1. usq. ad 11.*] De confessione auriculari sentit 1. Informandum ritè esse populum ut fiant fideles, 2. Lapso esse excommunicandos, 3. Fidelibus libertatem esse relinquendam, cui & quando peccata sua confiteri velint. (*Cap. XX. §. 12. usq. ad 19.*) Oblatas in usu sacrae cœnæ tanquam panem spurium abrogandum esse, sed cum consensu Ecclesiæ, item candelarum usum, atque omnia festa secundum consilium Lutheri. (*Cap. XX. §. 20. 21. 22.*) Musicam Ecclesiasticam & Organum item Imagines non plane tollendas esse, sed abusum corrigendum. (*Cap. XX. §. 23. 24.*) Denique de flexione genuum, & delectione capitis quoties nomen Jesu profertur, quædam monet, & controversiam super formula quâdam precandi pro iis qui ob religionem persecutionem patiuntur, in qua Reformatos fratres appellaverat, sibi motam commemorat. [*Cap. XX. §. 25. 26. 27.*]

§. 15. Ex hac summa scripti, quam hæcenus recensui, patet autorem, quisquis sit, esse virum de damno Josephi sincere sollicitum, ac pacificum, optimamq. eum intentionem habere uniendi Ecclesiæ protestantium. Sed tamen, uti regulariter fieri solet, ut facilius sit defectus indicare, quam genuina, remedia suppeditare, ita & huic auctori contigisse videtur. Remedia enim, quam ipse ad emendationem suppeditat, mihi quidem videntur non ubique sacrae scripturæ esse conformia, maximam verò partem, posito rerum presentium statu, moraliter, ut in praxin deducantur, impossibilia. Interim arbitror eum, ubi errat, bona fide errare, & præjudiciis multis communibus laborare, quorum præcipua videntur, quod dicta quædam scripturæ, præprimis novi fœderis, de potestate temporali intelligat, ac conceptum de iis

nimis Politicum sibi formet; quod Ecclesiæ primitivæ puritatem adhuc in temporibus Constantini Magni & subsequen-
tium vel quinti sæculi Imperatorum ac Præfulum Ecclesiæ quærat;
quodque principiis genuinæ doctrinæ civilis ac prudentia Politi-
ca noscendi animos hominum eorumque corruptionem, sit de-
stitutus, atque nimis indistincte de ministris Ecclesiæ ac vulgo
Laicorum optima quæquæ speret, & causas communium defectuum
Ecclesiæ fere omnes in potentes Laicos & Magistratum Politi-
cum rejiciat.

§. 16. Quemadmodum vero propositum meum non pati-
tur, ut singula distinctius examinem, sed illum laborem me
prudentioribus & eruditioribus relinquo, ita solum in vindi-
cando jure circa sacra Magistratui Politico competente ero oc-
cupatus. Ubi tamen præmoneo, me doctrinam istam ex Prin-
cipiis Politico-Ecclesiasticis & nobilissimæ partis Juris publici
ut quod ab aliis jam abundè factum est, non esse expositurum,
sed saltem vindicas scripturum, h. e. ostensurum, quod obje-
ctiones Autoris jura Principum cum successu non feriant, sed
potius ubique falsis nitantur hypothesibus & præjudiciis. Fa-
ciam vero id breviter & succincte, rationibus potius & dictis
scripturæ usus, quàm autoritatibus humanis. Unde non
ægrè feret lector, si multa allegata hic non sint comparitura.
Sequar etiam non alium ordinem quam quem Autor ipse
secutus est,

§. 17. Primarium præjudicium Autoris id videtur esse,
quod Apostolis in primitiva Ecclesia regimen aliquod Politi-
cum h. e. cum coactione aliqua externa conjunctum ad scribat.
Ita enim statim *cap. 1. §. 3. p. 3.* dicit, Ecclesiam tempore Aposto-
lorum à 19. ministris Ecclesiæ fuisse gubernatam, item *cap. 2. §. 2.
p. 28.* quod tempore Apostolorum quorundam Ecclesiæ Mini-
strorum officium in docendo, prædicando, adhortando, *guber-
nando* constiterit, aliorum in cura pàuperum & administratione
bonorum Ecclesiasticorum. Huc spectat etiam, quod patet,
Christum Ecclesiæ præcepisse, ut peccatores impœnitentes
Eccle-

Ecclesiæ manifestentur, & præcedente causæ cognitione, in qua potiores esse debeant partes Presbyterorum, ejici ex Ecclesia debeant, *Cap. I. §. 11. p. 9.* quodque Paulum tanquam legislatorem, cujus lex in excommunicatione observanda sit, sistat, *Cap. XIII. §. 4. p. 260.* item, quod rîmis securè pronunciet, modum controversias definiendi per majora esse verbo Dei præceptum *cap. XVII. §. 7. p. 374.* & quæ passim in toto libello occurrunt.

§. 18. Quibus nihil aliud opponimus quam dictum Christi *Matth. XX. 25. Marc. X. 42. Luc. XXII. 25. Principes & Reges gentium dominantur, & magni ac potentes potestate Politica gaudent, ac Protectores appellantur. Vos autem non sic.* Uti vero meum jam non est, dictum illud tanquam satis apertum prolixè exponere, ita optandum foret, ut in Commentariis & Postillis id diligentibus fieret, & clero etiam nostro parendi gloria cum majori emphasi inculcicaretur. Potestas spiritualis Ecclesiz & ejus Ministris competit, quæ quamprimum ei admiscetur aliquid potestatis politicæ seu coactionis externæ, spiritualis esse desinit, & in Papo-Cæsariam aut Cæsaro-Papiam degenerat.

[illegible]

§. 20. Deinde quod προισταμένως illos attingit, de quibus Paulus *Rom. XII. v. 8.* loquitur, & contextus & alia loca ostendunt, quod ei non sit sermo de potestate aliqua Politica cum coactione conjuncta, sed de cura Presbyterii, & tali quidem quæ etiam de Diaconis prædicatur, adeoque vox illa propriè denotet *Vorsteher* non ita benè reddita sit per *Regierer*. *Conf. 1. Tim. III. 4. & 12. & V. 17.* Idem Paulus: *Tit. III. 4.* ἵνα Προτιξῇσι καλῶς ἐργῶν προοίσαται: ut curent benè agendo *precedere*. Quæ præcedentia uti omnes Christianus, ita vel maximè Presbyteros decet, sed nullam coactionem infert nec ea habet opus.

§. 21. Etsi vero in altero loco. *1. Cor. XII. v. 28.* vox Κυβερνήσεις gubernationes denotet, non tamen propterea violentæ & politicæ intelligendæ sunt, sed tales, quæ magis exemplum præbendo ac operando, (quales etiam esse debent gubernationes Presbyterorum,) quàm imperando expediuntur, unde & Domini exercitationum maritimarum aut naucleri gubernatores appellantur. *Act. XXVII. v. 11. Apoc. XVIII. v. 17.* Quamvis etiam adhuc dubium non contemnendum restet, qui factum, quod Paulus in verbis sequentibus illius loci, ubi præcedentes varias classes Christianorum ac Doctorum repetit, gubernationum harum non iterum mentionem injiciat, sed eas planè omittat, de quo tamen malo alios audire, quàm ipse quid definire.

§. 22. Quod autem porro Autor putat, Christum jus fuisse, ut delinquentes cum causæ cognitione ejiciantur ex Ecclesia, id haud dubiè ex malè intellecto loco *Matth. XVIII. v. 15. seqq.* qui communiter de excommunicatione violenta exponitur, quam tamen neque status Christianismi primorum temporum admittit, neque ex ullis genuinis interpretationis regulis Christum in mente habuisse ostendi potest. Quin potius verosimile valdè est, Christum in illo loco per verba, quod is qui Ecclesiam non audiat, debeat haberi pro Ethnico & Publicano, non aliud voluisse, quàm quod gradibus prius ibidem observatis,

is, qui satisfacere læso non vult, debeat conveniri coram magistratu pagano æque ut alius Ethnicus vel publicanus, utpote quorum hi nonnisi à Magistratu coacti solabant satisfacere læsis. Conf. monitum Pauli *1. Cor. VI, v. 1. & seqq.* Nunquam Christus approbavit excommunicationem illam Judaicam cum violentia conjunctam, ac postea per Papatum in Christianismum introductam, tantum abest, ut eam vel simile quid in illo loco Christianis præcipere voluerit.

§. 23. Idem error est, cum Paulus tanquam legislator de excommunicatione ab autore sistitur ob malè intellectum *caput 5. Ep. 1. ad. Cor. vers. 2. 7. 11. 13.* ubi non aliud vult Apostolus, quam quod Corinthii partim singuli se ipsos emendare debeant *v. 7. & 13.* partim quod incestuosum & alios delinquentes in Ecclesia debeant jure quarumvis societatum imperio carentium, admonere, ut conversatione sanctiori & familiari donec emendetur abstineat, *v. 2. & 13.* Nullam habebant potestatem Christiani tempore Apostolorum, ullum hominem infamia afficiendi, itaque graviter videntur errare, qui istud Apostoli, quod cum peccantibus non debeant comedere, ita crasse exponunt, ut correspondeat moribus hodierni, quibus abstinemus, ne comedamus cum carnificibus aut licitoribus &c.

§. 24. Denique error, quod verbum Dei præcipiat ut controversæ de mysteriis fidei per majora vota in Conciliis debeant dirimi & errantes condemnari, ex mala expositione *capitis 15. Act. Apost.* ortum duxit, quamvis & hic communis error autorem seduxerit, processum conciliorum Clericalium ex illo capite justificans, cum tamen in concilio illo Apostolico nulla fuerit lis de purè credendis seu de mysteriis divinis, ac nulla species judicii, nulla pluralitas votorum, nulla præminencia aut autoritas Apostolica, nulla sententia judicialis vel quasi, nulla condemnatio errantium effectu externo pollens, nulla coactio legalis, sed simplicissima decisio litis de faciendis ortæ ac per compromissum liberum partium concilio Hierosolymitano proposita; & quidem per unanimum assensum singulo-

rum in Ecclesia Hierosolymitana, convictorum plane ratione indissolubili & quasi palpabili Petri; (quod gentiles absque circumcissione Spiritu Sancto repleti fuerint,) subsecuta etiam liberrima acceptatione hujus decisi à quærentibus & compromittentibus. Ut adeò hac dere plura addere non sit opus.

§. 25. Errore autem isto de gubernatione quasi Politica Presbyterorum semel admissio, videtur autor noster variis erroribus de Episcopis & potestate Episcopali involutus esse. Ita pro vero agnoscere nequeo, quando §. 6. *Cap. II. p. 35.* asserit, Apostolos in primitiva Ecclesia in qualibet Ecclesia particulari constituisse Rectorem supremum, cui soli titulum Episcopi, alias omnibus Presbyteris competentem *Act. XX. v. 28.* tribuerint. Omnes Presbyteros stilo Sacræ Scripturæ esse Episcopos ex allegato loco facile agnosco. Unde vero probabit Autor, Primum aliquem rectorem inter presbyteros ab Apostolis fuisse constitutum, eumque vocatum esse cum eminentia episcopum? Certè neque loca *1. Tim. IV. v. 14. & Tit. I. 5.* ab autore *p. 36.* allata quicquam probant, neque inscriptiones, ad quas ibidem provocat, epistolarum ad Timotheum & Titum, in quibus uterque secundum nonnulla exemplaria appellatur *πρωτὸς ἐπίσκοπος*. Quidsi enim illas inscriptiones pro spuris habeamus? Quidsi primum Episcopum non de supremo quoad potestatem, sed de primo quoad numerum explicemus? Id vero plane ignorantiam controversiarum Ecclesiasticarum in Autore videtur arguere, quod *p. 37.* pro sua sententia locum Hieronymi adducat, cum tamen sit potius pro nostra, quod vel initialia loci adducti verba (*Idem est ergo Presbyter, qui & Episcopus*) ostendunt, & eruditis ex variis variorum, puta Hammondii, Blondelli, Salmasii aliorumque scriptis notum est.

§. 26. Uti vero facile largimur Autori, *Cap. II. §. 7. p. 39.* quod sub Imperatoribus Christianis Episcopi sibi vindicare cœperint regimen seculare, & populum Christianum ab obedientia Christi abduxerint, & legibus humanis gravissime oneraverint; ita hæc observatio eum debuisset cautiorem reddere, ne, quod passim facit,

facit, Episcopos temporum Constantini & sequentium Imperatorum, pro viris Apostolicis & veris Christianis habuerit. Concedimus & id auctori, quod Episcopi ad stabiliendam potestatem suam sibi in Jure Canonico Jus aliquod Episcopale formaverint, (cujus summa capita recenset. *Cap. 2. §. 8.*) quodque Jus hoc Episcopale Papisticum in verbo Dei non sit fundatum, & reverà pro crudelissima animorum tyrannide habendum sit, *Cap. 2. §. 9. p. 44.* exinde tamen non sequitur, taxandos esse Principes protestantes, quod hoc Jus Episcopale sibi vindicaverint, & quod institui debuisset tempore reformationis presbyterium ab Episcopo per leges Ecclesiasticas gubernandum. Potestatem Politicam ab Episcopis mala fide possessam & isto Juri Episcopali insertam Principes recte vindicarunt sibi, tyrannidem animorū in Jure Papistico Episcopali simul latentem aut non vindicarunt sibi, aut si forte & hic peccatum fuerit, hoc distinctiorem notam merebatur. Nulla potestas Ecclesiæ qua tali competit, leges Ecclesiasticas condescendi, nec ulla gubernatio exterior Episcopo sine regimine seculari adscribi potest, à solo Principe & ejus voluntate in Republica dependente.

§. 27. His prænotatis jam facile responderi poterit objectionibus auctoris, quas contra Jus circa sacra Magistratus Politici *capite tertio* ex professo movet. Ubi statim initio insignis nāvus occurrat, dum §. 1. & 2. p. 46. asserit: Theologos & Politicos Protestantes in exponendo jure majestatico sacrorum inter se circa varia capita dissentire, in eo tamen fere convenire omnes, quod dicant: Experimentiam docere, Clericos olim in negotiis religionis sibi nimium vindicasse, quare nec vitio sit vertendum Magistratui Politico, si in negotiis religionis plus sibi vindicet, quam ipsi de jure competat. Sane qui tam crasse philosophetur in hac doctrina, neminem scimus, & oportet Autorem minis superficiali & obiter inspexisse Grotium, Vossium, Carpzovium, Conringium & Henrichium p. 46. allegatos, si tam ineptam doctrinam in iis reperuisse sibi persuasit. Notissima est in negotio eruditorum distinctio, inter potestatem internam & externam, eam in finem ad-

ducta,

ducta, ut ne magistratui nimium tribuant; quamvis id non negemus, sæpius erroneè ad alterutram harum potestatum referri, quæ eo non pertinent. Quare alii eadem distinctione abstinere voluerunt tanquam obscura, & asserere, magistratum Politicum omnia etiam in rebus Ecclesiasticis posse, quæ non repugnent rationi & juri divino, quæ sententia etiam videtur omnium simplicissima.

§. 28. In eo tamen placet institutum auctoris, quod contraversionem hanc secundum communia quædam & indubia axiomata, & hypothesas ab omnibus Christianis receptas examinare voluerit. Ita enim & nos breviter ostendere poterimus, quæ vel circa illa axiomata & hypothesas, vel circa earum applicationem monenda veniant. Ponit vero Axiomata XX. §. 2. p. 47. seqq.

I. *Omne officium humanum seu summum, seu imum dependet vel à jure naturali, vel à jure positivo divino vel à jure positivo humano.* II. *Quicquid Deus mandat & vetat, illud sine exceptione observandum est.* III. *Omnis lex (scilicet positiva, nam lex naturalis cordibus humanum est inscripta) ita perspicue proponi debet, ut ab iis, quos obligat, faciliè possit intelligi.* IV. *Quicquid non est perspicue (sive verbis expressis, sive sensu, qui ex regulis bonæ interpretationis facile elicitur,) propositum, illud vim legis non habet.* V. *Cui summa potestas (humana) concedit magnum aliquem magistratum, ita ut velit illi à populo obedientiam præstari, & quidem sub gravis pœna periculo, hunc præcipue necessum est instruat clarissimis sua voluntatis testimoniis.* (Jura vero Majestatis non difficulter ex recta ratione & principiis genuinæ Politicæ, sacris literis non adversantibus deducuntur. VI. *De quo cerò (adhibitis semper regulis bonæ interpretationis, & vitata vocabulorum captatione) constat, esse sic à Deo revelatum, illud sic, & non aliter, ut revelatum est, intelligi debet & applicari.* VII. *Jus positivum humanum non præjudicare debet seu derogare juri divino, (universali, præcipienti aut vetanti, bene tamen juri particulari & Legibus Mosaicis forensibus, item juri divino permittenti.)* VIII. *Veritas non dependet ab autoritate humana, sed à se ipsa, (scilicet à recta ratione & revelatione divina.)* IX. *Cui à Deo magistratus*

concreditus est super subditos, ille recte (ut quilibet paterfamilias) suorum subditorum curam habet, non tantum temponalem, sed etiam spiritualem, (absque tamen imperio in conscientias.) IX. Qui dicit, jus supremum circa sacra sibi competere, & hoc suo munere nibi dignum agit, ille vehementer peccat.

§. 29. Axioma XI. Qui scit & potest bonum facere, & tamen non facit, facturos etiam (debite) bonum (verum, non imaginarium aut cerebrinum) impedit, vehementer peccat. XII. Quicquid de jure uni suprema potestati competit circa sacra in suos subditos, hoc etiam competit alteri, (nisi hæc potestas legibus fundamentalibus vel simili modo sit restricta.) XIII. Quodcunque jus circa sacra magistratus in unum subditorum competit, hoc etiam (positis iisdem circumstantiis) competit in omnes sibi subditos, (nisi iterum obstat pacta & leges fundamentales.) XIV. Sola exempla humana (malem vocem: humana omittere ob mox dicenda) neque probant, neque improbant aliquid. XV. In Conscientias (de negotio salutis & mysteriis divinis, non vero si conscientia circa res politicas sint erroneæ,) solus Deus imperium habere debet. XVI. Quod quis ipse pro impio habet, non potest alteri obirudere, ut pro pio & iusto habeat. XVII. Qui contra conscientiam Deum colere aut aliquid (tanquam ad cultum divinum pertinens) agere, (aliud si rem indifferentem omittere jubeatur,) cogitur non potest Deo gratia esse, quando obtemperat cogenti. XVIII. Conscientia laesa non potest tranquillari, nisi Deus ex sua voluntate placatus sit; (Conscientia tamen erronea in negotiis politicis facile potest corrigi, si quis modo affectus & præjudicia, præprimis auctoritatis humanæ ac Pseudodivinae velit abjicere.) XIX. Omnis reformatio (Politica, nam spiritalis reformatio aliorum ex imperio non datur) rei deprivata, non ad nostrum beneplacitum (irrationale) sed ad perfectum rei statum est instituenda, (si modo perfectus ille status rei per reformationem possit obtineri.) XX. Non est boni viri, nedum Christiani, rationibus (non pluralitate votorum) convictum esse, & convincentem non tantum odisse sed etiam persequi.

§. 30. Hypotheses apud omnes Christianos receptas sex tradit p. 51. seq. I. Magis obediendum est DEO, (sive in sacra Scri-

D

ptura

prura quid præcipienti, five per lumen cordium de officio nos admonenti,) *quam hominibus*, (& ab iis introductis opinionibus erroneis, quamvis verustis, aut etiam conscientiarum nostrarum nonnisi præjudiciis stabilitæ) II. *Apud Deum non est respectus Personarum*, (sed Clerus tamen, cum homines & subditi sint, Principes debent venerari, & iis, ut alii subditi obedientiam præstare, non imperare eorum conscientis, multò minus ullam violentiam erga eos exercere.) III. *Omnia magistratus est à Deo five bonus five malus*. IV. *Deus voluntatem suam nobis revelavit* (in rebus supernaturalibus) *in scripturâ sacra*, (in rebus naturalibus & moralibus in cordibus nostris.) V. *Servus sciens voluntatem Domini & non faciens, duplo vapulabit*. VI. *Cui multum est datum, ab eo multum quæretur, & cui commodaverunt multum, plus petent ab eo*.

§. 31. Essent quidem, quoad singula axiomata, item quoad hypothesès fortè plura monenda. Quia tamen Autor in applicatione eorum ad quæstionem præsentem partim non omnibus utitur, sed potius, meo quidem iudicio ea toti potius libello quàm huic quæstionì in specie debuisset præmittere, cum ex illis omnes ferè conclusionès libelli deducere velit, partim, ut ex sequentibus patebit, plura circa applicationem eorundem ad quæstionem præsentem, quam circa axiomata ipsa (aut, si scholasticus stylus magis placeat, plura circa minorem quàm maiorem) monenda sint, nolo hic prolixior esse. Ita quoad Axiomata 15. 17. 18. præter ea, quæ in parenthesisibus per modum limitationis aut declarationis addidimus, prolixiorè multis de causis mererentur discussionem. Etenim non solum censura digni forent, qui definitionem casuum conscientiarum Politicis ac Jctis planè adimere & solis Dominis Theologis vindicare satagunt, (*vide interim Gottfr. Arnoldi Bircken Historie lib. 16. c. 12. §. 36.*) sed & studio JureConsultorum non indignum foret, diligentius quàm hætenus factum fuit, expendere, quinam sit effectus in jure exceptionis conscientiarum, item clausulæ salvæ conscientiæ. Ita enim hominum natura est, ut quamcunque hypocrisin aut perniciam ac inobedientiam item injustitiam exceptione conscientiarum suarum palliare intendant. Ex alterâ parte non negandum est,

est, magistratum politicum omni cura id intendere debere, ut subditorum conscientiz non dominetur, sed, quantum salvâ pace publicâ fieri potest, eidem, etiamsi erronea sit, indulgeat. Ita clausula, quantum salvâ conscientiâ facere possum, pactis adjecta, eadem ferè eludit, atque alteri parti occasionem præbere solet, conventionem infirmandi. Sic autor *cap. 19. §. 2. p. 379.* memorat, in conventu Marpurgensi an. 1529. inter Lutherum & Zwinglium conventum fuisse, ut non obstante dissensu inter eos de sacræ Cœnæ Mysterio, utraque pars alteri charitatem Christianam exhiberet, quantum salvâ conscientiâ id fieri posset. Quid vero per hanc clausulam fuerit effectum, eventus docuit. Sic autor *cap. 20. §. 11. p. 443. statuit*, ministrum Ecclesiæ, debere privatâ autoritate & sine deciso concilii exorcismum omittere, & omnia propterea pati, exemplo Lutheri, qui cum videret, quod Magistratus Politicus defectibus Ecclesiæ mederi noller, ipse *secundum suam conscientiam* id fecerit. Idem tamen *cap. eod. §. 20. p. 455.* etsi statuat, oblatas Lutheranorum, quibus in sacrâ cœnâ utuntur, non esse verum panem, sed inventum purè Papisticum, monet, eas sine consensu Ecclesiæ à Presbytero privatâ autoritate tolli non posse, addita ratione, quod sit ceremonia, quæ non ita graviter *vellicet conscientiam* ac Exorcismus. Quidsi jam alius alios conscientiz stimulos sentiret, & putaret gravius lædi conscientiam, in usurpatione harum oblatarum, cum per eas aliquid in substantialibus sacramenti fuerit mutatum, quàm Exorcismum, ut qui substantialia baptismi non tollat, præprimis cum ipse autor *cap. 20. §. 8. p. 439.* statuatur, Lutherum non errasse, quod exorcismum retinuerit. Quomodo jam hujus conscientiz consuleret Autor? Confer quæ suprà §. 2. de Inspectore Birsteinenfi ad conscientiam suam provocante retulimus. Itaque tentandum erit JCtis, annon possint certæ regulæ dari, ad quarum normam utrumque extremorum evitetur, & ut magistratus non nimis dominetur conscientiis imbecillibus, & ut tamen omnis præscindatur occasio subditis jussu magistratum aut pacta sub prætextu conscientiz eludendi. Sed ut dixi, ista quidem discutere parum proderit ad vindicias præsentis, sed reservanda sunt illa

peculiari discursui *de jure conscientia erronea*. Id saltem præmoneo, regulas Theologorum Pontificiorum de conscientia parum profuturas esse ad istam disquisitionem, cum ne quidem definitiones eorum multum in recessu habeant. Quid enim est conscientia erronea? Et quis fatebitur se habere conscientiam erroneam? Quidsi dicamus: Conscientiam erroneam esse sententiam de moralitate actionis humanæ repugnantem opinioni communiter in Republicâ receptæ? sed cogitandum eâ de re ulterius.

§. 32. Interim de axiomate XIV. autoris quædam adhuc notanda erunt, potissimum, quod deprehenderimus ejus pravum intellectum aut plane ejus neglectum, occasionem ferè unicam dedisse auctori, impugnandi jura Magistratus Politici, atque eadem erroneè vindicandi Clero. Verus & communis sententia est: Exemplum non probant sed illustrent, à quâ descendit altera: Exemplorum non requiritur veritas. Mirandum igitur, cur autor illam sententiam in dicto axiomate limitaverit, quod valeat saltem de exemplis *humanis*. Quid enim sunt exempla *humana*, & quibus opponuntur? Non possunt aliis opponi, quam *divinis*, sed quæ obscurum erit jam, quid sint exempla *divina*, & utrum de his exemplis contraria priori sententiæ assertio sit facienda? Sane Deus de se prædicat, quod faciem suam mutare velit in speciem crudelis. Sanè Christus ejecit profanos è templo. Utrum propterea hæc exempla probant, homines posse crudelitatem exercere, aut doctores Ecclesiæ posse hoc exemplum Christi imitari? Non arbitror. Porro utrum etiam pro divinis exemplis habenda, quæ à Viris divino spiritu actis gesta sunt? & quomodo secernenda erunt exempla horum virorum quatenus divino spiritu impulsii egerunt, & quatenus aliquid humani passi sunt? Sanè & Simson erat vir divino actus spiritu. An vero propterea excusationem mereretur, qui uxorem infidelem invidis parentibus ducere vellet, qui scorta sectaretur, &c.? Quæ quis divino Spiritu impulsus præter ordinem naturæ & moralitatis agit, non possunt alii imitari, nisi eodem spiritu agentur. At si impulsus divinum sentiunt, regula de exemplis quatenus ea imitanda sint vel minus

minus, non habent opus. Adde, quod communis sententia sit, exempla heroica non esse imitanda. Et quodnam jam criterium erit dijudicandi vel in se vel in aliis, utrum spiritu divino, an humano an fortè diabolico sub specie angeli lucis se insinuante, quis fuerit actus? Igitur limitationem illam auctoris non agnosco, sed absque limitatione axioma, illud assumo. *Exempla non probant aliquid neque improbant, sed rationibus aut legibus ubique opus.* Si ex exemplo Autor vult facere regulam vel legem, pugnat contra axioma IV. *Quicquid non est perspicue propositum, illud vim legis non habet.* Atqui in exemplis omnibus, etiam divinis, semper adest obscuritas & necessaria ex ipsis legibus aliis disquisitio, utrum legis locum obtineant, nec ne.

§. 31. Utinam verò monita hæc observasset autor, & sic evitasset, ut sæpè adversus ea non erroneè impingeret. Quomodo in questione quam tractamus, sæpè falsus de probatione exemplorum conceptus ipsi imposuerit, mox videbimus. Sed & alibi errores similes observationem merentur. Ita jam §. 31. attulimus, quod ex exemplo Lutheri privata autoritate sacra emendantis regulam faciat, & exinde inferat, eodem modo posse etiam exorcismum abrogari. Ita Cap. 15. §. 3. p. 314. ab exemplo incestuosi, per integrum annum, ut putat, à Paulo excommunicati infert, quod & nos debeamus excommunicatos poenitentiam præ se ferentes, non statim recipere. Ita Cap. XVIII. §. 1. p. 366. per exemplum concilii Hierosolymitani putat à Spiritu Sancto regulam esse præscriptam, quod omnia scandala per doctrinam aut vitam data conciliis debeant definiri &c. Quod si hæc exempla pro humanis habeat autor, impinger ipse contra regulam à se limitatam, quod exempla humana non probent. Quod si verò, ut omnino videtur, pro divinis habeat, recurrent monita nostra. In concilio quidem Hierosolymitano præsedit Spiritus Sanctus, sed hic restat canon: *Exempla non faciunt regulam.* Item Concilia non omnia habent Spiritum S. præsentem. In exemplo Pauli (præter ea, quæ jam supra §. 23. monimus,) dispiendum foret, utrum ex voluntate Pauli, annon potius ipso indignante incestuosus per annum in statu excommunicationis

manferit? Utrum Paulus haud dubiè Spiritu Sancto actus cum incestuosi corpus Satanæ traderet, eodem Spiritu impulsus fuerit in determinatione temporis illius, de quo autor agit. Maximum verò dubium occurret de Luthero, quo Spiritu sit actus, cum sua autoritate Wittebergæ reformaret, & utrum vir optimus hic non aliquid humani fuerit passus? Vereor enim, ut huc applicare ad Lutherum possit autor argumentum, quo *cap. 15. §. 17.* in alio exemplo humano utitur. Si Symbolum Nicænum à Spiritu S. dictatum, cur non & in eodem Concilio publicatæ Leges Ecclesiasticæ, potissimum de ordine & processu excommunicationis Spiritui Sancto forent adscribendæ? Grave profecto dubium, ad quod quomodo ii, qui excommunicationem restaurandam negant, responsuri sint, & utrum majorem an minorem limitare velint, ab aliis audire malim, quam ipse aliquid definire.

§. 34. Nunc videamus, quid in quaestione nostra fundamentis suis superstruat Autor. In §. 3. d. c. 3. solum axioma 9. ad Principes protestantes quod & illi curam gerere debeant salutis æternæ subditorum applicat, qua quidem in re nos habet consentientes, additis tamen limitationibus ipsi jam axiomati adjectis. Quod vero Autor in eodem paragrapho etiam illud axioma ex verbis *Deut. XVII. 18.* (quod Rex Legem Mosaicam describere, & eam diligenter legere debeat, ut discat Deum timere, & secundum legem vivere.) probare velit, in eo assentiri non possumus. Etsi enim Autor dicat sub illa lege non solum comprehendere leges politicas, sed & Ecclesiasticas, ut ipse Rex observer, quod Populus Israeliticus secundum utraq; vivat, dubios tamen nos reddit. quod de cura subditorum non loquatur Moyses. Et quid si loqueretur, an propterea hic juberet Moyses, ut Rex habeat curam salutis æternæ populi Israelitici? An populus Israeliticus per Legem Mosaicam fuit salvatus? Hic itaque Autor haud dubiè non cogitavit de axioma IV. *Quicquid non est perspicue propositum, illud vim legis non habet.*

§. 35. Pergit autor, §. 4. p. 53. Etiam tempore Regum Israelis & Judæ hoc præceptum Mosaicum (quod, ut Autor intelligit, nullum esse ostendimus,) fuisse observatum, Initio enim Davidem

videm multa introduxisse ad cultum divinum pertinentia, perfecisse vero rem totam Salomonem. Imo laudatos fuisse Josaphatum & Hiskiam, purgantes cultum Divinum à ritibus paganis. Hic equidem nolumus pro defendendo Jure Majestatico circa sacra ex illis exemplis argumentum afferre, partim ne ipsimet impingamus in Regulam: exempla non probant; partim ut evitemus vitium vulgare à statu Judaicz Republicæ & temporibus Veteris Testamenti argumentandi ad statum aliarum rerum publ. & tempora fœderis novi. Interim vereor, ut multum his exemplis accedat sententiæ Autoris. Sanè David ministros cultus ipse elegit, sine consensu plebis aut aliorum ministorum. *1. Chron. XVII. 4. XXIV. 6. XXV. XXVI. XXVII. qvin* potius ad id negotium adhibuit Politicos ac Milites. *Ib. Cap. XXVI. v. 1.* Quod si agitur David hæc omnia fecit secundum voluntatem Dei, ut Autor concedit, & in Novo Testamento nulla lex reperitur, quæ Principibus hoc jus vel simile adimat, (utpote quam Autor dare nequit) quo jure volet doctrinam suam stabilire, quod ministri Ecclesiæ non sint eligendi à Principe sed à plebe & presbyterio?

§. 36. Ut huic dubio satisfaciat autor, supponit: §. 5. p. 54. seq. Nullius Principis in Sacra Scriptura fieri mentionem, qui in cultu divino aliquid secundum suum beneplacitum ordina-verit, quod Deo fuerat gratum. Sed omnia quæ fecerint eos fecisse ex mandato vel impulsu divino sive mediato sive immediato. Mosen omnes leges Ecclesiasticas immediatè à Deo accepisse. Davidem ipsum, cum contrà prohibitionem Dei introduci vellet arcam fœderis, sensisse se quid injusti fecisse *1. Chron. XIV.* nec permisisse Deum Davidi, ut ipse secundum suum beneplacitum Templum extrueret *1. Chron. XIX.* Quod vero David multa circa Sacerdotes & Levitas ipse ordina-verit, explicanda esse ex *1. Chron. XXIX. 11. 19.* ubi dicitur David Salomoni narrasse, quod de extru-tione Templi typum acceperit à Domino, ut videlicet Salomon Templum secundum proprium beneplacitum extrueret &c. Sed nescio an hæc Responsio Autoris dubium sit sublatura, Objectio erat de Ordine Le-
vitar

uitarum à Davide instituto, ipse respondet de imagine templi. Videtur etiam autor miscere leges de cultu divino *contra & præter* iussum divinum. Non placet Deo Cultus ex astutia humana adversus leges divinas inventus. An etiam omnis cultus displiceat præter iussum divinum institutus, ulteriore disquisitione foret opus. Sanè Deus Corda respicit. Nec displicuit ei cultus Regis Ninive quamvis præter iussum ejus institutus. Si nullus cultus valet, nisi speciali iussu divino institutus, sive mediato, sive immediato non valebit etiam hodiè ulla institutio cultus, etiamsi ille fiat consentiente tota Ecclesia & Ministris. Nullos enim Prophetas habemus, qui voluntatem Divinam aperiant. Et quid dicet autor de diebus jejuniorum & pœnitentiæ, si ex devoto corde adhuc hodiè instituuntur?

§. 37. Ex dictis vero jam patet, quid sentiendum sit, cum autor §. 6. p. 58. infert, ex S. Scriptura se demonstrasse, quod incumbat Majestati, ut de cultu divino subditorum, quò ille secundum voluntatem Dei celebretur, seriò sit sollicitus; sed minimè competere Majestati, ut secundum beneplacitum proprium divinum cultum, aut ejus modum vel etiam personas cultui destinatas ordinet & constituat, quin potius hæc omnia fieri debere, secundum claram & apertam Dei voluntatem. Scilicet, nondum demonstravit autor *præter* Divinam voluntatem nihil posse ordinari, nondum demonstravit, Principem non posse instituere ministros cultus. Miscuit etiam beneplacitum politicum & beneplacitum pium ac devotum. Quid quod etiamsi hæc omnia de temporibus veteris testamenti demonstrasset, nihil tamen adhucdum demonstrasset de Principibus nostris sub Novo fœdere viventibus. Ipse autor argumentationem à statu V. T. ad nostra tempora perspicuè improbat *Cap. IX. §. 4 p. 174.* ubi notat, Romanos Pontifices, quod omnia ex V. T. conquissiverint & Christianæ Religioni immiscuerint, ut statum suum potentia & opibus firmarent. Hoc itaque & sibi dictum putet.

§. 38. Dum ergo ipse ad N. T. transit, putat §. 7. *U' 8. p. 58. seq.*

seq. In prioribus tribus sæculis nihil occurrere quod confirmet officium Magistratus Politici circa Religionem, cum Imperatores potius Christianam religionem persecuti fuerint. Neque etiam legi, in N. T. præceptum esse ut Principes debeant confiteri veram religionem, eam promovere aut docere subditos, quin potius Apostolos docuisse eam, etiam invitis principibus. Sed quia tamen demonstratum sit, jure naturali & divino curam veræ religionis incumbere Magistratui, id quidem sufficere. Hic semel monendum, Autorem in hoc capite sæpe ad demonstrationes suas provocare, cum tamen raro quid demonstraverit, ne opus habeamus, hoc monitum semper repetere. Ita quoad jus naturæ de cura hæc magistratus nihil demonstravit, sed solum *axioma IX.* tanquam indubitabile posuit. De jure divino, quomodo ejus demonstratio comparata sit, ostendunt dicta §. 24. *seqq.* Et quid si probasset? Probasset saltem jus divinum Mosaicum. At quid jus Mosaicum ad principes nostros? Videat ergo ipse, annon objectione hac sua totum illud axioma suum 9. destruat, præprimis, cum ipse curam cum violentia conjunctam magistratui adscribat, ut vel ex iis patet, quæ *cap. 18. §. 7. p. 375.* alserit, quod Magistratus debeat conclusa Conciliorum relegatione & depositione damnatorum exequi; qualem quidem violentiam limitationes nostræ non admittunt. Qua ergo demonstratione hic utetur autor? Jus Naturæ violentiam in rebus religionis ignorat. Ignorat etiam jus divinum Mosaicum. Christus ipso fatente talem curam Magistratui non demandavit. Jam urgeo axioma 4. Quicquid non est perspicue propositum, illud vim legis non habet. Taceo, quod istud axioma de cura utriusque tabulæ magistratui incumbente videatur originem debere Papatui, ut videlicet Episcopi Reges & Principes omnes sibi facerent obnoxios, & omnem tyrannidem & Papo-Cæsariam per eos exercere valerent, quamvis & post reformationem sæpius Principes hanc sententiam æquivocam in præjudicium Cleri retorserint, & sub prætextu, quod sint custodes utriusque tabulæ Cæsaropapiam exercuerint, ut adeo jam Centuriatores de hæc formula conquesti fuerint *Tom. VII. præf. p. 10. ap. Arnold. Birkben historie I. 16. c. 16. §. 15.*

§. 39. Illud autem responsionem vix meretur, quod autor §. 8. p. 61. ut saltem aliquam religionis veræ curam magistratui incumbentem ex prioribus tribus sæculis eruat, observet, Imperatores tamen Romanos, quamvis præter intentionem instrumenta Dei fuisse ad promotionem fidei Christianæ & veræ religionis, dum Paulum defenderint *Act. cap. 21. 22. 23. 24. 25.* Ex ista enim observatione nulla alia cura religionis demonstrabitur, quam cura præter intentionem, quæ an cura vocanda sit, ipse autor dispiciet.

§. 40. In §. 9. & 10. statum controversiæ format, ac sententiam suam de juribus Magistratus circa sacra dicit, jam supra §. 5. distincte propositam. Patet vero ex ibidem dictis quod revera Majestati omne jus circa sacra tollere, eamque presbyterio & Ecclesiæ subicere intendat, quo pacto annon principia Papatus reapse, etsi forte præter intentionem, defendat, ipse etiam judicet.

§. 41. Summa argumenti primarii, quibus jus hoc circa sacra impetit illud est §. 10. & 11. p. 65. seq. Afferentem jus Majestatis circa sacra id perspicue & irrefutabiliter demonstrare debere per axiomata III IV. V. Demonstrandum autem esse secundum axioma 1. omne officium ex jure naturæ vel divino vel humano. Jus naturæ nihil aliud monstrare quam officium curandæ salutis æternæ secundam formam à Deo præscriptam. At formam hanc non præscribi à jure naturæ sed à verbo revelato. Nullam autem adesse legem divinam, magistratui Politico concedentem jura leges Ecclesiasticas dandi, controversias definiendi, disciplinam Ecclesiasticam & Ceremonias ordinandi, mutandi dispensandi, formulas precum præscribendi, presbyteros Ecclesiæ, Magistratui in casibus conscientie inobedientes dimittendi, aliosque iis substituendi &c. nisi quis forte ex SS. Literis ad exempla Jeroboami, Achab, Achasi, Antiochi & aliorum publicorum peccatorum provocare velit, quod tamen etiam repugnaret Axiomati XIV. Hic varia responderi possunt.

§. 42. Initio argumentum hoc adversus ipsum Autorem retorquere vellem, ut ejus imbecillitatem & fallaciam eo melius sentiat. Quid si enim dicerem pari modo. Afferentem Ecclesiæ in
 Repub-

Republica eusque Presbyterio potestatem leges Ecclesiasticas condendi, controversias definiendi, disciplinam & leges Ecclesiasticas ordinandi &c. id perspicue & irrefutabiliter probare debere per axiomata III. IV. V. Demonstrandum autem esse secundum Axioma I. omne officium aut ex jure naturæ, aut ex jure divino, aut ex humano. Jus naturæ nihil aliud monstrare, quam officium parendi omnibus subditis incumbens, & quod duæ potestates summæ in una Reip. esse nequeant. At Jus divinum nihil de hac potestate dicere, neque usquam concedere Ecclesię & ejus presbyterio potestatem leges Ecclesiasticas condendi, controversias definiendi, disciplinam Ecclesiasticam & Ceremonias ordinandi, mutandi, dispensandi &c. nisi quis fortè ex historia Ecclesiastica priorum quinque seculorum provocare velit ad exemplum Præfulum Ecclesię sub Constantino, Theodosio &c. ac aliorum publicorum peccatorum, quod tamen etiam repugnaret Axiomata. XIV.

§. 43. Deinde, ut auctori fallacias, quas committit, distinctius ostendamus, initio male ad quæstionem præsentem applicat Axiomata III. IV. V. Quæstio est de jure Majestatis. Jus hic sumitur non pro lege sed pro attributo personæ & sic pro jure permissivo; Axiomata vero III. & IV. loquuntur de Lege seu jure præcipiente ac prohibente. Deinde jam supra limitavimus illa axiomata, quod intelligenda sint de jure positivo, at Jus Majestatis circa sacra ex jure Naturæ deduci potest. Quod axioma V. concernit, ostendimus supra, & id de officio à Magistratu Politico concessio loqui. At Magistratus Politicus jus suum circa sacra habet non ab alio Magistratu Politico aut summa potestate humana, sed à Deo.

§. 44. Porro, quod in specie jus naturæ continet, ab aliis jam Jurisprudentiæ Ecclesiasticæ Doctores ostensum fuit, quomodo ex eo Jus Majestatis circa sacra deducendum sit. Rem in summam contrahamus. In omni Republica Majestas, seu summa civitatis ubique potestas datur. Vi hujus summæ potestatis Magistratus Politicus Christianus determinare poterit per leges omnes actiones civium jure Naturæ aut divino positivo universali

nondum determinatas. Ecclesia est in Republica, non vero Resp. in Ecclesia. Ecclesiz nullum imperium à Christo & Apostolis in N. T. datum est. Non possunt esse duæ summæ potestates legislatoriz &c. in una Republica. Ministri Ecclesiz & reliqui qui in societate Ecclesiastica vivunt sunt subditi Magistratus Politici. Ergo Magistratus Politicus etiam horum actiones etiam ad religionem pertinentes determinare poterit, modo legibus illis nihil jubeat, quod juri divino universali repugnat.

§. 45. Ulterius Autor in argumento quod ipse ex jure naturæ format, initio statum controversiæ mutat, & cum questio concepta sit de jure Magistratus Politici, seu facultate morali activa, ipse loquitur de officio Magistratus Politici, seu qualitate morali passiva, inter quæ duo est insignis differentia. Deinde insignis fallacia est, quod ideo neget officium magistratus erga veram Religionem ex jure naturæ deduci posse, quia jus naturæ ostendere non possit, quænam sit vera religio. Idem enim esset ac si statuerem, officium Jsaaci erga Abrahamum patrem, aut officium Achabi erga Nabothum ex jure Naturæ deduci non posse quia jus Naturæ non ostendat quod Abrahamus sit pater Jsaaci, & quod vinea sit Nabothi.

§. 46. Pergit Autor §. 12. p. 67. *seqq.* ad Praxin primitivæ Ecclesiæ à Spiritu S. ut dicit, introductam, ad quam tanquam ad normam secundum Axioma XIX. Ecclesiæ nostræ reformandæ sint. Hanc autem ostendere, quod controversiæ in causis religionis ab Ecclesiâ & ejus Presbyterio fuerint definitæ. In primâ siquidem controversiâ de circumcisionis necessitate cautum esse prudenter ab Apostolis & Presbyterio Ecclesiæ, ne Ecclesia Christiana turpi schismate divideretur. Congregasse itaque se Apostolos Jerosolymæ tanquam in loco præcipuo, congregasse ad se Presbyterium & Ecclesiam, deliberasse de negotio & conclusum formasse, cui se omnes subjecerint Ecclesiæ reliquæ. Similiter controversiam de Festo Paschatos tandem definitam fuisse in Concilio Nicæno. Novatum in Synodo Romano, Paulum Samosatenum in Concilio Antiocheno, Arium in Concilio Nicæno damnatos fuisse. In his omnibus Conciliis nullum Magistrati

tui Politico locum fuisse, plura vota Patrum de re accuratè deliberantium rem definivisse. In prioribus tribus Seculis, ubi Ecclesia adhuc pura virgo manserit, ne quidem Magistratum adfuisse in Conciliis. Concilium Nicænum quidem promovisse Constantinum, eique interfuisse non solum tanquam Christianum, sed & ut Principem, at nullum votum dedisse, sed simpliciter acceptasse, ac defendisse conclusa sanctorum Patrum, tanquam cœlestem veritatem, imò sic modestum se gessisse, ut ne quidem controversias Episcoporum privatas definire voluerit, diserte asserens, Sacerdotes à DEO positos esse cum potestate de Laicis judicandi, Laicos vero non posse judicare de Sacerdotibus. Praxin hanc Ecclesiæ haut dubiè à Spiritu S. tempore Apostolorum introductam esse, adeoque esse Legem divinam positivam, scil. ut singulæ Ecclesiæ deputatos ad Concilium eligant, qui nomine suæ Ecclesiæ votum det, ut ita per majora conclusum concilii fieri possit. His omnibus nihil novi reponimus, sed repetimus saltem eæ, quæ jam prænotavimus §. 24. 26. & 32. scilicet: Concilium Apostolicum omnia, quæ eminentiam Cleri & coactionem involverunt in Conciliis subsequenter, dissimillima habuit. Exempla non faciunt legem. Constantini tempore Ecclesiæ, ipso hic fatente autore, non fuit virgo, sed per illam Constantini adulationem de Clero non judicando à Laicis Papatus fuit stabilitus, cujus adeo fautor est Autor, non Evangelicæ doctrinæ de Clero Laicorum imperio subiecto, si istam adulationem approbat, quod tamen de ipso præsumere nolumus. Etiam in prioribus tribus Seculis Papatus fundamenta fuere jacta, & jam posita tempore conciliorum Nicænum præcedentium.

§. 47. Eædem responsiones locum invenient ad ea, quæ jam sequuntur apud autorem in §. 13. p. 71. seq. Legum Ecclesiasticarum constitutionem non soli Magistratui Politico, sed toti Ecclesiæ competere, sic probare intendit. Tempore Apostolico Leges Ecclesiasticas factas de usu eorum, quæ idolis oblata erant, de suffocato item ac sanguine, quæ omnia secundum hodiernam

praxin Christianam sint indifferentia, & eo tempore ne fidelibus Judæis scandalum daretur fuerint ab Apostolis prohibita *Act. 15.* Hoc exemplum primorum Christianorum subsequenribus fuisse instar legis, secundum quod usu exigente postea alias leges Ecclesiasticas condiderint, puta de festo paschatos, de jejniis & pœnitentiâ Ecclesiasticâ. Ipsum Constantinum non invasisse hæc jura Ecclesiæ, sed permisisse, ut Patres in Conciliis Canones plurimos conderint. Neque præsumendum esse à tam sanctis Confessoribus & Martyribus, eos crimen læsæ majestatis commisisse, ac jus legislatorium Imperatori competens invasisse. Accedit, quod falsissimum sit Apostolos *Act. 15.* ista pronunciasse tanquam leges Ecclesiasticas. Conventus eorum primariò institutus erat ad definiendam quæstionem ex compromisso de circumcissione, cujus declarandæ gratia reliqua de idolothytis &c. adjiciebantur. Erat autem jam antea lege divinâ prohibitum de talibus non comedendis, igitur tanquam doctores saltem declarabant leges has veteris Testamenti Christianos adhuc obligare debere, ne quærentes, dum audirent, circumcissionem non amplius esse necessariam, putarent, & hæc licere. Quin si à Spiritu Sancto tum demum illæ Leges ut Ecclesiasticæ sunt conditæ, quærerem ex autore, quando Spiritus Sanctus has leges iterum abrogaverit, quas tamen jure hodie non amplius observari ipse autor facile concedit. Novit etiam Autor, Martyrium non facere Christianum, & Christus docet non Confessores introituros in regnum cœlorum, sed eos, qui voluntatem Patris in cœlo operantur. Neque tamen & crimen læsæ Majestatis committit, qui ex indulgentia & socordia Principum juribus Majestatis etiam parum Christianè utitur. Ipse autor supra §. 26. dixit Martyres illos & Confessores sub imperatoribus sibi regimen seculare vindicasse, & populum Christianum ab obedientia Christi abduxisse &c.

§. 48. Illud vero nescio an responsionem mereatur, quando autor §. 14. p. 73. ex dictis *Matth. 16. v. 18. 1. Tim. 3. v. 15.* quod Ecclesia Christiana sit fundata super Petram, & extructa super fundamen-

damento Apostolorum & Prophetarum, ubi Christus sit lapis angularis &c. inferre vult, quod, quoties leges Ecclesiasticae condendae sint ac controversae definiendae, apud Ecclesiam Christianam refugium sit quaerendum. Utenim mitissimè dicam, quod sentio, non melior est connexio in hoc argumento, ac in vulgato: stat baculus in angulo, ergo cras pluet.

§. 49. Sed & ad ea, quae §. 15. p. 75. seq. de disciplina Ecclesiastica & excommunicatione soli Ecclesiae absque praesentis & directione Magistratus Politici vindicanda asserta, jam supra §. 22. & 23. responsum praestitimus. Ait nempe in duobus locis *Matth. XVIII. 15. seq.* & *1. Cor. V.* verbis luce meridiana clarioribus eam Potestatem soli Ecclesiae tribui, praepriis cum Christus non dicat: dic Principi, dic Consistorio, sed dic Ecclesiae. Ostendimus autem ibidem illa loca scripturae de disciplina quaedam Ecclesiastica ac excommunicatione non loqui. Apertius de iis non loquitur locus tertius *II. Joh. V. 10.* eum qui doctrinam Christi non afferat, non hospitio suscipiendum esse nec ei dicendum esse ave, quamvis & ipse d. p. 75. ab autore communem errorem secuto, huc applicetur. Nihil enim aliud dicit Apostolus, quam ut à conversatione familiari cum impiis abstineamus.

§. 50. Quod si porro quis summam demonstrationis pro jure majestatico circa sacra supra §. 42. adductae curatè expendat facile deprehendet, impertinens esse postulatum auctoris §. 16. p. 77. Magistratum Politicum haecenus recensita Jura Ecclesiastica juxta exercere non posse, nisi speciale mandatum divinum producat, quo leges priores divinae Ecclesiae talia jura tribuentes abrogat & jura illa in Magistratum sint translata: quamdiu hoc non fiat, Magistratus illud jus non esse nisi Allotrio-Episcopiam & Caesaro-Papiam. Quam in rem etiam loca duo ex B. Luthero & D. Spenero adducit, ad quae, etsi facile ostendere possimus, ea auctori parum prodesse, brevitatis studio respondemus, nos non disputare auctoritatibus sed rationibus.

§. 51. Quare nec solliciti esse debemus, ut iis multa regeramus, quae Auctor §. 17. p. 81. seq. adversus illos disputat, qui Jus
Princi-

Principum circa Sacra ex Jure humano, id est ex Instrumento pacis deducunt, quibus respondet ex axiomate VII. Jus humanum non posse derogare juri divino; quamvis etiam autor duas distinctas quæstiones confundat, quo jure scilicet Magistratus politicus in genere Jus circa Sacra exerceat, & quo Jure Principes Protestantes in Imperio; illa ex Jure Naturæ, hæc ex historia Germanica & principiis juris publici decidenda est. Quod autem adversus illos, qui Principum Imperii jus circa Sacra ex superioritate territoriali deducunt, urget, hoc pacto competiturum etiam esse Imperatori Turcarum ac Tartarorum jus circa Sacra ob Axioma XII. partim innuit, eum non intelligere, quid sit superioritas territorialis, partim docet, quod sine ratione pro absurdo habeat, quod absurdum non est. Quis enim neget, Imperatorem Turcarum habere jus circa Sacra?

§. 56. Ne tamen noster videatur magistratui Politico omnia jura circa Sacra adimere, putat §. 18. p. 87. seq. sat habere Magistratum, in quo jura hæc exerceat, si protegat Ecclesiam, ac ortis controversiis Synodum in territorio suo ordinet, ejusque conclusum exequatur ac condemnatos deponat ac ejiciat, exemplo Aurelii Imperatoris & Constantini. Sed hoc pacto Magistratus fiet nudus minister Ecclesiæ, & Presbyterium dominabitur. Oblitus etiam fuit noster sui axiomatis, quod exempla humana nihil probent, dum p. 88. seq. protestantes Principes jubet exemplum capere ab Aureliano Ethnico Imperatore, qui Paulum Samosatenum antea ab officio deponere noluerit, donec ab universa Ecclesia fuerit damnatus. Quare ex hoc infert, à principibus nostris nullum Ministrum Ecclesiæ esse relegandum aut deponendum, nisi per legitimam Synodum condemnatum.

§. 53. Illud vero non omittendum, quod Autor. *ibid.* p. 89. ita philosophetur. Principes non posse obtrudere in causis religionis decisionem controversiæ alicujus, etiam si, fortè in decisione sua veram sententiam arripuerint. Nam secundum morem Spiritus Sancti nonnisi per concilia ita determinari quæstiones,

siones, ut reliquiis acquiescere debeant. Qui extra Concilium quæstiones ejusmodi determinare velit, cum oportere esse infallibilem, cum tamen infallibilitas nulli homini concedenda sit. Hic initio facile auctori indulgemus, Principem non posse violenta decisione uti, non magis, ac aliquod Concilium. Cum tamen Principes, quotiescunque decisionibus ejusmodi uti sunt, id fecerint per Theologos; quibus infallibilitatem, (& rectè quidem) noster denegar, inde videtur gravis obiectio adversus ipsum autorem formari posse. Theologi qui in concilio dirimunt controversias per vota sua, aut Spiritu S. aguntur aut minus. Si posterius, nec conclusum per vota majora erit conclusum infallibile Spiritus Sancti. Si prius, possent etiam singuli extra concilium infallibiliter controversias definire, & ita posset etiam Princeps eorum ministerio, extra concilium uti, nisi fortè absurdè adstruere velis, Spiritum Sanctum alligatum esse loco Concilii tanquam officinæ suæ. Quamvis nec apud nostros sit infrequens, ut cathedram Ecclesiasticam officinam Spiritus Sancti appellent.

§. 54. Vult etiam autor in reliquis juribus Ecclesiasticis suas partes esse debere Magistratui Politico. In consiciendis legibus Ecclesiasticis dicit §. 19. p. 90. magistratum politicum hoc opus dirigere & facilitare, posse magistratum dispicere, an disciplina Ecclesiastica ubique sine respectu personarum exerceatur; debere eum sollicitum esse, ut vocatio ministrorum Ecclesiæ apud omnes Ecclesias fiat secundum verbum Dei, & ut Presbyteria definito auctoris modo instituantur. Sed vel hic iterum autor magistratui Politico relinquit solam exequendi gloriam ea, quæ Presbyterium conclusit, vel fateor me non intelligere quid autor velit.

§. 55. In §. 20. p. 91. seq. Autor ipse objectionem sibi format. Si presbyterio concedenda esset potestas aliquid in Ecclesia ordinandi, nullam definitionem esse sperandam, sed perpetuas lites presbyterii inter se. Respondet vero, causam, quod presbyterii ita sint ad litigia proni, esse, quod ministri non sint legitime

gitime per Ecclesiam vocati, & quod careamus iusto Presbyterio. Sed quis hanc causam sibi persuadebit? Szpè inculcavit Autor, Ecclesias nostras ad tempora Constantiniana esse reformandas, utpote ubi ab Ecclesiis ministri sint electi, & presbyteria autoritate polluerint. At quando unquam maiores rixæ fuerunt, quàm illis temporibus? Singulis annis nova Symbola eudebantur, & Concilia urgebant Concilia. Loquitur id Historia Ecclesiastica unanimiter. Et ex vita Constantini M. notum, sanctos illorum temporum martyres & confessores ita pruritu ligandi fuisse infectos, ut Cæsar coactus fuerit, istorum libellos accusatorios in universum cremandi.

§. 56. Claudic Autor hoc caput, & fatetur in §. 21. p. 92. seqq. se hanc methodum tractandi didicisse ex Conringii concussione fundamentorum fidei Pontificiæ, unde etiam quædam axiomata depromserit, ac insuper arbitratur, quemadmodum scriptum illud Conringii titulum concussionis fundamentorum Pontificiorum jure mereatur, ita etiam posse caput hoc tertium jure appellari: Propugnaculum inexpugnabile Regiminis Ecclesiæ Christi. Conringii tractatum non legimus. Nec ad rem præsentem opus est. Utrum vero hac propugnaculum inexpugnabile Autoris expugnaverimus, judicet benevolus lector.

§. 57 In Capite IV. Autor prolixè probare intendit, electionem ministrorum Ecclesiæ competere Ecclesiæ & Presbyterio, non Principi. Sed cum hic nil nisi praxin Primitivæ Ecclesiæ & sic mera exempla afferat, ad hunc medium terminum vero ad nauseam sit responsum, nolumus hic prolixitate ulteriori autorem imitari. Sed putamus ea quæ in juribus Ecclesiasticis protestantium Principum de electione ministrorum Ecclesiæ disposita sunt, nec jurinaturæ nec principiis Christianismi repugnare, etsi forte praxis non semper respondeat ordinationibus.

§. 58. Quæ capite V. pariter contra jus patronatus disputat, cum non respiciant ipsum jus magistratus politici, transeant. Interim sic putamus: multos abusus hoc jus patronatus irrepsisse, interim tamen in se non videri repugnare aut rectæ rationi aut scriptu-


scripturæ; optandum equidem esse, ut ob nimium ejus abusum id abrogetur, sed non sperandum, minimè vero omnium, quod Patroni protestantium sponte huic juri suo sint renunciaturi, ut consulit autor.

§. 59. Ex reliquis capitibus quod nos attineat nihil restat peculiari observatione dignum, nisi dum *Cap. 16.* autor factum Ambrosii Theodosium excommunicantis defendit, iterum communem doctrinam secutus. Nos uti factum Imperatoris cujus gratia excommunicatio illa facta dicitur, improbamus, ita nec factum Ambrosii probare possumus, sed insignem hic factum Episcopi Mediolanensis sub larva zeli divini, forte & ipsummet decipientem, subsuiffe ac totum hoc negotium direxisse arbitramur. Quæ autor contra disputat ea præjudicio nituntur jam sæpius rejecto, quasi Christus & Paulus excommunicationis Ecclesiasticæ legem tulerint, & vero per hypothesein secundam apud Deum non sit respectus personarum. Sed quemadmodum præcedens refutatio præjudicii illius nobis jam otium facit, ut non opus habeamus in conclusione hac nos detinendi, ita & hypotheseis illa secunda quod apud Deum non sit respectus personarum, male huc applicatur, ut vel ex limitatione, quam eidem supra §. 28. subjecimus, patet. Majori verosimilitudine nituntur illi, qui lege universali capitalem homicidii pœnam dictatam esse docent, quam qui excommunicationis legem à Christo deducunt. Quid si jam Ambrosius Theodosium tot homines innocentes interficientem, sub prætextu zeli divini jussisset iterum capitali pœna affici, allegans illam autoris hypothesein: apud Deum non esse respectum personarum? Credo quemlibet, sensisse, eam malè fuisse applicatam. Nec est, quod dicas magnam differentiam esse inter excommunicationem & decollationem. Ita quidem est. Sed nec ego à pari argumentor, at solum paràm aptam applicationem hypotheseos quod apud Deum non sit respectus personarum, instantia infringo. Deinde quid mali potestas excommunicandi quemvis, etiam Principem, Episcopis in dulta, Reipublicæ ac tranquillitati universorum intulerit vel historiarum Imperatorum Germanicorum, præ-

cipuè Henrici IV. non loquuntur sed clamant, donec ex principis sanioribus vel bruteitas vel brutalitas illorum fulminum fuerit afferta. Taceo, quod adhuc dubium videatur, an excommunicatio illa Theodosii istis circumstantiis, quibus ex Ruffini Historia Ecclesiastica & Historia Tripartita eam refert noster *disso cap. 15. §. 4. p. 340. seq.* unquam facta fuerit. Video enim in historia Ecclesiastica Gottfr. Arnoldi simplicius narrari, quod Ambrosius Theodosium ob factum illud ad communionem admittere noluerit, *lib. 4. cap. 2. §. 23. Conf. Elia du Pin. de antiqua Ecclesia disciplina dissert. 7. §. 3. p. 499. seq.* Sed ista jam non vacat prolixius discutere.

§. 60. Apparet vero ex hætenus dictis, quantum intersit ad securitatem Principum defendendam, ut communes & ex neglectu etiam inter protestantes, receptæ opiniones in doctrina Juris Ecclesiastici, prima fronte quidem principibus blandientes, reapse tamen eosdem arbitrio ac libidini Cleri subjicientes, emendentur, neque Principes sibi amplius imponi patiantur, noviores has emendationes tanquam impias aut quieti publicæ periculosas non esse tolerandas. Quod si enim doctrinæ istæ homini cetera pio ac de damno Josephi sollicito, qualem Autorem nostrum esse supra diximus, imposuerunt, ut, dum defectus Juris Ecclesiastici apud Protestantes (quos non negamus) emendare studet, reverà consiliis suis, bona fide quidem, Papismum crassissimum stabiliat, quid fiet, si ex doctrinis istis conclusiones deducant homines imperium Politicum magna cura ambientes, & speciminibus variis de jure decidendi controversias Theologicas ac similibus animum suum aperte prodentes? Sed speramus meliora. Fiet enim, & certè fiet, ut si eruditi aliarum facultatum jura Principum tueri atque Papatum Ecclesiarum protestantium detegere nolint, id tamen facturi sint Politici ac Jure Consulti, utpote ad quos etiam primario ea res pertinet.

Faxit Deus Feliciter.





COROLLARIUM

PRÆSIDIS.

Sponsione certaverant duo amici, utrum annus currens sit ultimus hujus seculi, & seculum novum incipiat statim, quamprimum scribatur Annus 1700. an vero annus currens sit penultimus, & novum seculum incipiat, post ultimum Decembris anni 1700. scil. die 1. Januarii anni 1701. Compromiserant in me. Respondi, prius mihi videri verius. Videbatur enim res definienda esse ab ætate hominis & modo istam computandi cum & computare annos nostros soleamus à nativitate h. e. ab ætate Christi: Jam vero si Christus adhuc in his terris degeret, diceremus, quod explevisset annos 1699. adeoque annus currens pertineret ad annum seculi ultimum

umum. Postea quaestione hac subinde in conversationibus proposita deprehendi, illam valde esse dubiam, & vix tres in conversatione quadam de ea esse unanimes. Quæsiui adeò cum utroque rationes non improbables afferantur, annon certius quid definiendi possint suppeditari argumenta. Omne momentum in eo situm est: an tempus denominemus ab annis currentibus, an ab adimpletis. Evolvi Chronologos, neque hic aliquid memoratu dignum deprehendi. Ex præstantissimis enim observavi, quod inconstanter annorum myriades & secula modo ab anno primo, modo ab anno ultimo præcedentis myriadis vel seculi incipiant. Ex scriptoribus historiarum secularium aliqui seculum v. g. decimum textum incipiunt anno 1501. & finiunt anno 1600, aliqui incipiunt ab anno 1500. & finiunt anno 1599. Neque ex doctrina de Jubilæis certius quid desumere potui, præstantissimis Chronologis de computatione Judaicorum Jubilæorum graviter inter se dissentientibus.

Adde

Adde quod in Papæis Jubilæis vel eadem remaneat petitiō principii: Utrum annus Jubilæus celebretur in ultimo seculi anno, an in primo? vel, si maximè hic certi quid possit afferri, inter Protestantes tamen recepta est doctrina, Papam posse errare. Inquirendum ergo unicè esset, quomodo à primis Christianis primus Christi annus sit scriptus v.g. an ea quæ nondum absolutis duodecim mensibus gesta sunt, dixerint facta esse primo Christi anno, an saltem quinto vel sexto mense à nativitate Christi. Sed quis hæc definiat? Ergo mihi videtur adhuc responsio data in verosimilitudine sua manere, donec afferatur quid verosimilius. Neque aliena est hæc quaestio à Jurisprudencia. Narravit enim mihi Vir fide dignissimus P. W. M. A. in provincia quadam Imperii Præfectum provinciae interdixisse rusticis sub pœna gravi, ne hoc anno feras venientur. Rusticos fuisse attonitos, cur, quod hactenus nunquam licuerit, hoc præcisè anno sub pœna prohibeatur, Seniores autem narrasse

junio-

unioribus, quod habeant antiquum privilegium, venandi ejusque seculi anno ultimo. Ergo rusticos non obstante Præfecti prohibitione strenuè hoc anno venationi dedisse operam, ac Præfecto urgenti, quod sequens annus demum sit ultimus hujus seculi, respondisse, majores suos similimodo circa finem præcedentis seculi, fuisse in exercitio juris sui impeditos, ac persuasos ut venationem ab ipsis anno 1599. prætersam differrent ad annum 1600. Isto vero anno comparante eos fuisse impeditos sub prætextu, quod annus jam præteritus fuerit ultimus. Rem ergo adhuc coram supremo illius loci judicio ventilari. Quamvis vero res nondum definita sit, & definitio etiam illa extrà territorium jus facere nequeat, nescio tamen, quomodo & hæ circumstantiæ mihi meam sententiam adhuc verosimiliorem reddant.

F I N I S.

✽(o)✽ ✽(o)✽
✽(o)✽